

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN CHA KEE CHIN [RASAH]

TARIKH : 21 SEPTEMBER 2021 (SELASA)

SOALAN

TUAN CHA KEE CHIN [RASAH] minta **MENTERI ALAM SEKITAR DAN AIR** menyatakan apakah pendirian Kementerian tentang pembinaan insinerator baru dan syarat-syaratnya. Sama ada kerajaan bersetuju dengan pembinaan insinerator baru di Lot 43852 (PT6327)/HS(D) 206502, Bandar Seri Sendayan, daerah Seremban, yang mana lokasinya berdekatan dengan pelbagai projek perumahan, komersial, pendidikan dan perindustrian yang pesat membangun.

JAWAPAN

Tuan Yang Di-Pertua,

1. Untuk makluman, keputusan bagi kelulusan pembinaan insinerator di tapak yang dimaksudkan adalah di bawah tanggungjawab Pihak Berkuasa Yang Meluluskan (PBM) iaitu Majlis Bandaraya Seremban selaras dengan dasar dan polisi yang ditetapkan.
2. Sekiranya Laporan EIA diluluskan, Kementerian melalui Jabatan Alam Sekitar (JAS) akan mengeluarkan lesen operasi insinerator buangan terjadual berkenaan selaras dengan peruntukan di bawah Seksyen 18, Akta Kualiti Alam Sekeliling 1974.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : Y.B. DATUK SERI SHAMSUL ISKANDAR
@ YUSRE BIN MOHD AKIN
[HANG TUAH JAYA]**

TARIKH : 21 SEPTEMBER 2021 (SELASA)

SOALAN

**DATUK SERI SHAMSUL ISKANDAR @ YUSRE BIN MOHD AKIN
[HANG TUAH JAYA]** minta **MENTERI KANAN PERDAGANGAN
ANTARABANGSA DAN INDUSTRI** menyatakan apakah strategi Kerajaan di dalam meningkatkan keyakinan para pelabur selepas kegagalan Kerajaan menguruskan pandemik COVID-19 dan lockdown yang berpanjangan.

JAWAPAN

Tuan Yang di-Pertua,

Kerajaan sentiasa komited dan berusaha secara berterusan bagi memastikan Malaysia kekal sebagai pilihan lokasi pelaburan yang kompetitif dan mesra perniagaan lebih-lebih lagi ketika negara masih lagi berhadapan dengan pelbagai cabaran dan kesan akibat pandemik COVID-19.

Impak COVID-19 memberi kesan ketara kepada aktiviti pelaburan di seluruh dunia. Kerajaan telah mengambil pelbagai langkah proaktif bagi menangani impak COVID-19 kepada sektor ekonomi di negara ini. Antara langkah-langkah oleh Kementerian Perdagangan Antarabangsa dan

Industri (MITI) bagi memulih dan mengembalikan semula keyakinan pasaran dan pelabur di Malaysia termasuklah:

- i. menubuhkan *War Room* bagi memproses permohonan melalui COVID-19 *Intelligent Management System* (CIMS) dengan sokongan pelbagai Kementerian bagi membantu syarikat yang terlibat dalam perkhidmatan perlu bagi mendapat kebenaran beroperasi semasa Perintah Kawalan Pergerakan (PKP);
- ii. mewujudkan Jawatankuasa Rayuan yang membolehkan para pelabur dan syarikat yang terkesan teruk akibat kekangan pergerakan ekoran PKP untuk membuat rayuan bagi mendapatkan kebenaran beroperasi. Kes-kes yang mempunyai alasan kukuh akan dibawa untuk pertimbangan Majlis Keselamatan Negara (MKN);
- iii. melaksanakan libat urus berterusan dengan MKN berdasarkan input daripada pihak industri untuk membuka secara strategik sektor utama yang melibatkan rantai bekalan global berdasarkan Pelan Pemulihan Nasional (PPN);
- iv. membangunkan *Safe @work* yang merupakan suatu pembangunan SOP komprehensif untuk meningkatkan Langkah-langkah Penjagaan Kesihatan Awam yang mempertanggungjawabkan pihak majikan dalam menangani penularan wabak Pandemik COVID-19 di kalangan pekerja;
- v. memperkenalkan Program Imunisasi Industri COVID-19 Kerjasama Awam-Swasta (PIKAS) iaitu program yang menyediakan kemudahan Pusat Pemberian Vaksin termasuk perkhidmatan perubatan, bukan perubatan dan keselamatan. PIKAS membantu mempertingkatkan tahap pengambilan vaksin di kalangan tenaga kerja sektor perkilangan. Ianya merupakan usaha untuk mengurangkan bilangan kluster kerja COVID-19 bagi menjamin kesejahteraan pekerja dan merencanakan pemulihan ekonomi Malaysia; dan

- vi. membangunkan Portal Pelan Pemulihan Nasional sebagai platform yang memuatkan maklumat berkaitan bantuan Kerajaan, SOP berkaitan dan dokumen PPN serta berperanan sebagai medium Komunikasi antara Kerajaan dan rakyat bagi memastikan ketelusan dalam menangani pandemik COVID-19.

Tuan Yang di-Pertua,

Kerajaan telah, sedang dan akan terus menawarkan pelbagai insentif, inisiatif dan fasilitasi berkaitan pelaburan bagi meningkatkan keyakinan pelabur serta melonjakkan pelaburan langsung dalam negara seperti berikut:

- i. menawarkan pakej pengecualian cukai istimewa bagi menggalakkan syarikat asing memindah (*relocate*) operasi mereka ke Malaysia ataupun menubuhkan operasi baharu dan menjadikan Malaysia sebagai pusat rangkaian bekalan antarabangsa;
- ii. memberi insentif Elaun Pelaburan Semula (*Reinvestment Allowance atau RA*) tambahan sebanyak 60 peratus untuk syarikat sedia ada yang telah tamat tempoh RA dan Insentif RA Khas. Insentif ini diberikan untuk syarikat terlibat dalam aktiviti perkilangan dan pertanian terpilih serta menjalankan pelaburan semula bagi tujuan pengembangan, automasi, modenisasi dan kepelbagaian;
- iii. mewujudkan Pusat Sehenti (*One Stop Centre atau OSC*) di MIDA bagi menilai permohonan oleh pelawat perniagaan yang layak untuk memasuki Malaysia bagi tujuan perdagangan dan pelaburan. Inisiatif ini dikendalikan dengan kerjasama wakil-wakil dari Jabatan Imigresen, Kementerian Kesihatan dan MITI dalam memastikan kesahihan dan status kesihatan pelawat perniagaan sebelum memasuki Malaysia;
- iv. menubuhkan PACU atau dengan izin, *Project Acceleration and Coordination Unit* di MIDA bagi menyediakan fasilitasi secara keseluruhan (*end-to-end facilitation*) untuk memastikan semua

projek pelaburan yang telah diluluskan dapat dilaksanakan dalam tempoh masa yang ditetapkan; dan

- v. membangunkan Portal *InvestMalaysia* iaitu platform permohonan berkaitan pelaburan dalam sektor perkilangan dan perkhidmatan secara atas talian kendalian MIDA bagi membantu mempercepatkan proses permohonan dan pertimbangan projek pelaburan berkaitan.

Selain itu, aktiviti penggalakan pelaburan juga akan dilipatgandakan bagi memastikan Malaysia kekal kompetitif sebagai destinasi pelaburan pilihan melalui penganjuran Misi Perdagangan dan Pelaburan, *E-Specific Project Mission*, menandatangani perjanjian persefahaman serta menganjurkan webinar dengan kolaborasi bersama komuniti perniagaan dan menjalankan *media blitz* bagi mempromosikan Malaysia melalui media antarabangsa.

Langkah-langkah serta inisiatif yang diambil oleh Kerajaan ini terbukti memberi kesan yang signifikan apabila data-data mengenai peningkatan jumlah pelaburan diumumkan baru-baru ini. Bagi tempoh Januari sehingga Jun 2021, pencapaian yang memberangsangkan telah direkodkan dengan kelulusan pelaburan swasta bernilai RM107.5 bilion dalam sektor perkilangan, perkhidmatan dan utama menunjukkan lonjakan sebanyak 69.8 peratus berbanding RM63.3 bilion pada tempoh yang sama pada tahun 2020. Pelaburan yang diluluskan ini melibatkan 2,110 projek dan dijangka menjana lebih 44 ribu peluang pekerjaan.

Jumlah pelaburan langsung asing (FDI) secara keseluruhan telah meningkat sebanyak 215 peratus kepada RM62.5 bilion bagi tempoh Januari hingga Jun 2021 berbanding RM19.8 bilion pada tempoh yang sama tahun 2020. Pelaburan langsung domestik (DDI) menyumbang baki selebihnya iaitu sebanyak RM45 bilion, atau 41.9 peratus kepada jumlah pelaburan yang diluluskan.

Antara bulan April hingga Ogos tahun 2021, MITI serta agensi-agensinya yang berkaitan, telah mengadakan Misi Perdagangan dan Pelaburan ke Republik Korea, Jepun, Arab Saudi, Emiriah Arab Bersatu,

Qatar, Republik Austria dan Republik Turki. Misi-misi ini telah berjaya mendapatkan komitmen pelaburan sebanyak RM35.97 bilion dari pelabur-pelabur yang berminat dengan potensi mewujudkan lebih daripada 28,000 peluang pekerjaan.

Tuan Yang di-Pertua,

Kerajaan juga telah memperkenalkan kerangka dasar pelaburan baharu negara berteraskan Aspirasi Pelaburan Nasional atau dengan izin, *National Investment Aspiration* (NIA) yang telah mendapat kelulusan Jemaah Menteri pada 21 April 2021 bagi merencanakan lagi landskap pelaburan serta meningkatkan daya saing negara dalam tempoh jangka panjang. Pembaharuan kepada agenda pelaburan ini melibatkan lima (5) teras utama iaitu, meningkatkan *economic complexity*; mewujudkan pekerjaan bernilai tinggi; memperluaskan rangkaian domestik; membangunkan kluster baru dan sedia ada; serta mempertingkatkan keterangkuman.

Di sebalik cabaran ekonomi global yang disebabkan oleh pandemik COVID-19, Kerajaan akan terus komited untuk melaksanakan langkah-langkah strategik dan proaktif bagi memastikan Malaysia kekal menjadi destinasi pilihan pelaburan berkualiti tinggi yang kompetitif dan berdaya saing di rantau ini. Pelbagai langkah ini amat penting bagi memastikan ekonomi negara dipulihkan dengan segera bagi menjamin kesejahteraan dan kelangsungan hidup rakyat.

Sekian, terima kasih.